

Xojon carta xi ma-ne jàn xi kiskiì San Juan

Mé kjoa-ne nga ndaá chja Juan it'aà ts'e xita xi 'mì Gayo

¹Jì ndí 'ndsè xi 'mì-lè Gayo xi 'nó ndaà chibá ko xi nguì ko inima-na nga matsjake-lè, tikjiì-lè Xojon jè 'an xi xita jchinga 'mì-na ya ingo.

²Jì ndí 'ndsè, 'an, k'oaá s'ín tísjé-la Nainá, nga ndaà kàtitjo yije nita mé kjoa xi s'iin jì, koni s'ín ndaà tímachikon-t'in inima-lè xi it'aà ts'e Nainá, k'oaá tís'ín ndaà kàtijna jè yijo-lè nga nimé ch'in kàtas'e-la. ³Taxki 'nó kjòtsja-na k'e nga j'ii i'nga jñà 'ndsé xi tsibénojmí-na nga k'oaá s'ín tinijchí yijo-lè koni s'ín tjín kjoa kixi it'aà ts'e Cristo. ⁴Nì tì mé kjoa tjín-ne xi k'oas'ín 'nó matsja-la inima-na, ta jè-ne k'e nga 'nchrè nga jñà xi ndí ixti-na xan-la nga k'oaá s'ín nchisíjchá yijo-la koni s'ín tjín xi kjoakixi.

⁵Ngaji ndí 'ndsè xi 'nó matsjake-lè, 'nó kixi tinijchí yijo-lè, k'e nga k'oas'ín ndaà nìs'in-la ya ni'ya-lè jñà xita xinguiáá xi bijchókon-lè xi tikoá 'én-la Nainá mokjeiín-la; ko isaá ta ndaà tjín-isa k'e nga tikoá ndaà nìs'in-la jñà xita xinguiáá xi xìn i'nde f'ii-ne. ⁶Jñà xita xinguiáá k'oaá s'ín tsibénojmí kixi ya nguixkon xita naxandá-la Cristo, nga ngaji 'nó matsjachi ngats'ii xita xinguiáá koi. K'oas'ín ndaà tísiko-isi k'e nga kijchòkon-lè; tjìl-la mé xi mochjeén-la k'e nga tjímaya ya iya ndiyá. K'oaá s'ín tikoii koni s'ín sasén-la Nainá. ⁷Nga it'aà ts'e Cristo-né nga k'oas'ín jye tsibínè-la yijo-la jñà xita xinguiáá koi, nga k'oaá s'ín nchisíxá-la Jesucristo, ko majìn-la nga jñà kiskoé tsojmì xi tsjá-la xita xi mìtsà it'aà ts'e Cristo mokjeiín-la. ⁸Koii mochjeén-ne nga jñà oko-ná nga kisikoáá jñà xita xinguiáá koi. Tsà k'oas'ín kisikoáá,

tsò-ne kjoa nga ngàsòn títsanìka'bísoán jè 'én kixì xi ndaà tsò.

Kjoa ch'o xi s'ín jè xità xi 'mì Diótréfes

⁹Añ jyeé kiskiaà jngoò Xojon nga kisikasén-la jñà xità naxandá-la Cristo, tanga jè Diótréfes mìkìi sasén-la koni s'ín ki'mì-lajen, nga jè, koí xi mejèn-la nga ta jè kotixoma. ¹⁰K'e nga kijchoa, k'eé koxán kixì-la it'aà ts'e ngats'iì kjoa ch'o xi tís'ín, nga 'ñó ch'o tsò 'én ndiso xi tíbínè-najen. Kò mìtsà ta ya majngoò ikon, tìkooá mìkìi ma-la nga sís'in-la jñà xità xinguiá xi bijchókon ya ni'ya-la. Kò jñà 'ndseé xi mejèn-la nga sìs'in-la xità xinguiá, jé bíchjoè ikon-la, kò tìkooá ochrjekàjiin-né ya naxandá-la Cristo jñà 'ndsé xi k'oas'ín síkitasòn kjondaà koi.

¹¹Jì ndí 'ndsè xi 'ñó matsjake-lè, kì jñà chjìnguì-la jñà kjoa xi ch'o tjín; jì, jñà chjìnguì-la jñà kjoa xi ndaà tjín. Nga jè xità xi ndaà s'ín, xità ts'e Nainá-né; tanga jè xità xi ch'o s'ín, kj'eè kì beè yá-ne xi Nainá.

Kjondaà xi s'ín jè xità xi 'mì Demetrio

¹²It'aà ts'e Demetrio, ngats'iì xità k'ooá tsò nga 'ñó ndaà tjín koni s'ín tís'ín, skanda jè xi kjoa kixì, k'ooá s'ín okó nga jè Demetrio, ndaà tjín koni s'ín tís'ín; k'ooá tís'ín bixón-jen nga ndaà tjín koni s'ín tís'ín, kò ndaà 'yi nga 'én kixì-né koni s'ín bixón-jen.

'Én-la Juan xi fehet'aà-ne

¹³Tjín-isa-na mé 'én xi mejèn-na nga koxán-lè, tanga majìn-na nga tà Xojon sìikasén-lè; ¹⁴jè xi mejèn-na nga kjíkon xátí-lè; k'eé isa ndaà jchìbanojmiá k'e nga kìjchokon-lè.

¹⁵K'oas'ín 'nchán kàtìjna kjit'aà inìma-lè. Jñà xità xi ndaà óko-ná xi i ì'nde-la tísíhixat'aà-lè. Kot'in-la jñà xità xi ndaà óko-ná xi ya títsajnakò-lè, Nainá kàtasíchikon-t'in nga jngoò ìjngoò.